



Projetu Tasi Mane Nia Impaktu ba Feto sira

(Estudu Kazu iha Covalima, Manufahi no Viqueque)

Mahein Nia Hanoin Nú. 17, 28 Janeiru 2021



Foto husi Website ONG Lao Hamutuk

Fundaasaun Mahein (FM)
Website: www.fundaunmahein.org
2021



Kontiudu sira

Kontiudu sira	2
Sumariu ezekutivu	3
Introdusaun	5
Metodolojia	6
Kontextu Projetu Tasi Mane	7
Estudu Kazu Covalima	9
Estudu Kazu Viqueque	12
Estudu Kazu Manufahi	14
Feto no Seguransa	16
Konkluzau	22
Rekomendasaun	23
Aneksu sira	25
Bibliografia	27

Sumariu Ezekutivu

Komponente husi Tasi Mane maka baze forneseменту *Suai Suply Base* (SSB) iha Suai-Covalima, fatin ba *Refineria no Industria Petrokimika* iha Betano-Manufahi, no instalasaun planta LNG iha Beaçó-Viqueque, ne'ebé define ona iha PEDN. Iha implementasaun projetu ne'e Governu hahu ho faze konsultasaun públiku, no estudu sira kona-bá impaktu ba meu ambiente no uma, kontinua iha faze sira ba libertasaun rai no propriedade, no tama ona iha faze implementasaun.

Komunidade nia esperansa ba Tasi Mane maka benefisiu diretus no indireitus husi planu projetu ne'e nia. Komunidade sira lakon dadaun ona sira propriedade, rai ba halo to'os no natár, plantasaun, rai ba husik animal no mós ba hela fatin. Ida ne'e sai tiha ona preokupasaun boot ida ne'ebé iha comunidade afetadu nia le'et no liu-liu feto sira infrenta dadaun ona impaktu husi dezvoltimentu ne'e. Aleinde presau indireita ne'ebé kauza husi projetu ne'e, comunidade afetadu (feto) sira mos la hetan atensaun, no laiha infomasaun ne'ebé serteza kona-bá projetu ne'e rasik, nia impaktu ba sira nia moris iha aban bain rua nia.

Maske iha planu Governu nia, maka sei dezvoltu grupu ho atividade oin-oin ne'ebé ejiste partikulamente iha area afetadu sei hetan benefisiu ne'ebé maka'as wainhira projetu ne'e implementa. Maibe iha realidade hatudu oin seluk. Servisu ruma comunidade afetadu sira la hetan fatin atu servisu. No exemplu kazu iha implementasaun komponente SSB nia, iha konstusaun aeroportu no auto estrada iha Suai, traballadór sira ne'ebé mai servisu kompañia sira lori husi liur. Feto sira lahetan oportunidade ne'ebé barak liu atu bele partisipa. Feto sira hatete katak sira nia servisu maka kuda duut iha auto estrada ninin, tein hahan ba kompania ho traballadór ne'ebé sira bele fornese maibe ne'e mós indikasaun iha nepotizmu no familiarizmu.

Projetu ne'e implementa dadaun ona komponente iha SSB nia maka, aeroportu Suai no auto estrada (sei kontinua to'o Beaçó). Iha ona impaktu real ne'ebé comunidade sira hasoru dadaun ona, tratamentu desigual, presau no ameasa sira wainhira iha ejijensia sira ba nia direitu, nune'e mós fó ona impaktu ba meu ambiente, ba saude, edukasaun no ekonomia, no vida agrikula nia. Enkuantu iha komponente kona-bá refineria no petrokimika ne'ebé iha faze libertasaun rai, Governu halo disputa ba comunidade (balu) nia rai, ne'ebé hatudu dadaun ona dudu projetu ne'e ba oin ho forsa Estadu nian. No ida ne'e sai ona preokupasaun ema hotu nia ne'ebé hola parte iha peskiza ida ne'e, liu-liu feto pesoal ho lider organizasaun feto sira preokupa maka'as kona-bá tentativu sira ne'ebé sei sai poir liu tan hasoru feto sira iha implementasaun projetu ne'e iha futuru. Katak ho soseidade ida ne'ebé seidak sensivel ho asuntu jeneiru, potensia sira violensia domestika, violasaun seksual sei sai maka'as liutan. Iha ne'ebé komponente husi Tasi Mane ne'e liga ho fronteira terrestre no tasi rai vizinu rua ne'ebé nia dezvoltimentu abansadu. Haree fila fali ba Timor-Leste nia kapasidade ba seguransa ne'ebé sei frajil ba kondisaun, facilidade no ekipamentu, rekursu umanu no profesionalizmu.

Rekomendasaun

1. Rekomesaun ba Governu liu husi EKI (MPM, MJ, MAP, MAE, MI, SEMA) ba projetu Tasi Mane halo sensibilizasaun nasional kona-bá projetu ne'e nia impaktu



komunidade sira enjeralmente ba sira ne'ebé afetadu projetu Tasi Mane nia liu-liu ba feto sira;

2. Halo avaliasaun ba prosesu sira ne'ebé la'o ona liu-liu lisaun sira husi konstrusaun auto estrada no projetu aero portu Suai ne'ebé feto sira sai vitima maka'as ba dezvoltimentu ne'e husi prosesu inisiu to'o ramata;
3. Ministeriu Justisa-Sekretariu Estadu Teras Properiedade sosializa Lei Rai nian ba comunidade sira. Nune'e comunidade sira sensebilizadu ho lei rai nia no uza hodi rezolve disputa sira ne'ebé liga ho rai, tuir mekanizmu formal no tradisional;
4. Governu liu husi MPM, MEJD-SEFOPE indentifika no loke kursu vokasional besik ba comunidade sira. Formasaun iha area sira hanesan, ligua, enjineria, makanika, pedreiru, karpintaria, no mós formasaun ne'ebé foku ba area sira ne'ebé feto nia hanesan hospitalidade, hotelaria, nst;
5. PNTL preziza dezvoltolve polisimentu komunitaria hodi aproxima problema sira ne'ebé liga ho implementasaun projeitu, evita envolve atuasaun sira husi BOP;
6. Governu tenke iha planu ba projetu infraestrutura petroliu Tasi Mane nia nune'e iha konstrusaun sira tenke asesivel ba ema hotu liu-liu ba ema ho vulneravel sira.

Introdusaun

Projetu Tasi Mane maka mega projetu infraestrutur petroliu ne'ebé define iha Planu Estratejiku Dezenvolvimentu Nasional (PEDN 2011-2030). Komponente husi Tasi Mane maka baze forneseменту *Suai Supply Base* (SSB) iha Suai-Covalima, fatin ba refinaria no industria petrokimika iha Betano-Manufahi, no instalasaun planta Gás Natural Liquefeito (LNG-Sigla ingles) iha Beço-Viqueque. Husi komponente sira ne'e sei konstrui area ba atividade industria petrolifeiru, aeroportu foun/reabilitasaun, auto estrada liga husi Suai to'o Beço – Viqueque, inklui hari'i sidade foun, fatin hakiak lafaek no bairo foun, iha area ne'ebé projetu ne'e hari'i.¹

Iha implementasaun mega projetu ne'e, Governu hahu ho konsulta públiku (sosializasaun) hodi esplika kona-bá impaktu no benefisiu husi projetu ne'e ba comunidade sira, no mós dezenvolve tiha ona estudu viabilidade sira kona-bá impaktu ambiental, atu bele minimiza impaktu negativu iha meu ambiente no umanu. Oras ne'e daudaun projetu iha hela faze implementasaun, iha faze libertasaun rai no propriedade.² Maske nune'e ema barak la informadu lolos kona-bá projetu ne'e liu-liu comunidade afetadu (feto sira) kona-bá impaktu sira husi projetu ne'e nia. Husi ida ne'e mosu tratamentu desigual, presaun no ameasa, no mós lakon direitu, ne'ebé afetadu hasoru hela iha faze implementasaun projetu ne'e. Deskobre mós katak durante implementasaun projetu iha faze ida ne'e nia, Governu laiha estratejia ida ne'ebé introdus hodi involve partisipasaun feto, ne'ebé atu asegura katak direitu sira feto nia iha projetu infraestrutur petroliu ne'e garantidu no sira hola parte iha prosesu dezenvolvimentu ne'e.

Iha kontekstu ida ne'e dalabarak iha diskursu polítiku husi Governante sira hato'o hodi reforsa lei no política kona-bá hasa'e partisipasaun feto iha prosesu hotu dezenvolvimentu nasional nia. Fundasaun Mahein (FM) haree katak asuntu ida ne'e importante no parte hotu presiza haree katak implikasaun husi dezenvolvimentu Tasi Mane ba feto sira nia moris tenke tau atensaun no ida ne'e bele lori ba diskusaun ida ne'ebé parte hotu tenke fo opiniaun. Oinsa bele hetan solusaun ba impaktu husi dezenvolvimentu projetu infraestrutur petroliu ba feto sira nia moris ho komprensivu.

Nune'e iha rezultadu husi peskiza ida ne'e sei informa enjeralmente kona-bá dezenvolvimentu husi projetu infraestrutur petroliu Tasi Mane nia implikasaun ba Timor-Leste ho espesifiku ba feto sira nia moris. Iha ne'ebé desde ukun-an Governu halo ona esforsu maka'as liu husi komprimisiu no política sira ne'ebé estabelese atu dudu partisipasaun feto ba prosesu hotu iha dezenvolvimentu nasional. Nune'e iha relatóriu ida ne'e la hare deit ba impaktu husi dezenvolvimentu Tasi Mane, maibe tenta atu informa kona-bá problema ne'ebé mosu husi mega projetu Tasi Mane liga ho risku no ameasa sira ne'ebé comunidade afetadu hasoru, liu-liu impaktu sira liga ho feto sira nia moris.

¹ Plano Estratejiku Dezenvolvimentu Nasional (PEDN, 2011-2030) Paj.167

² Relatoriu Ministeriu Petroliu Minerais "Posesu Do Governasaun MPR, 22 Juñu 2018 – 22 Maiu 2020".

Metodolojía

Metodolojía ne'ebé uza iha peskiza ne'e halo entrevista pesoal no diskusaun ho grupu feto sira maka hala'o iha area afetadu projetu. Ekpa FM antes halo peskiza, hahu ho briefing husi ONG La'ó Hamutuk, ne'ebé hala'o iha FM, depois ba dezenvolve perguntas peskiza. Iha entrevista pesoal ne'ebé ekpa peskizadór sira FM halo ho lideransa komunitariu sira, Ministeriu Agrikultura e Peska, Sekretariu Estadu Teras e Properiedade, Provedoria Direitus Umanus no Justica (PDHJ), Polisia Nasional Timor-Leste, Organizasaun Sociedade Sivil sira; Grupu Organizasaun Juventude sira, no Grupu Organizasaun Feto, no comunidade afetadu, liu-liu feto iha area afetadu projetu. Intrevista ne'e hala'o iha nivel Suku no Munisipiu, iha Munisipiu Covalima (9); fetu (6) mane (3), iha Viqueque (14); fetu (6) mane (8), no Manufahi (8); fetu (6) mane (2), ho total entrevista (31).

Rezultadu peskiza ne'e, aleinde husi entrevista sira, FM mós halo observaun direita area ne'ebé projetu Tasi Mane lokaliza ba. Halo diskusaun ho comunidade afetadu sira, liu-liu fetu nia observaun, preokupasaun no prespetiva sira kona-bá problema ne'ebé sira rasik hasoru durante implementasaun projetu. Nune'e *Security Sector Discussion* (SSD) ne'ebé FM uza nu'udar metodu diskusaun ne'ebé hala'o hodi rekolla informasaun/dadus sira ne'ebé ho partisipante mai husi fetu. Iha SSD ne'e hala'o ho grupu fetu (3) ne'ebé hala'o iha Suku Labarai - Covalima partisipante (16)³ Suku Maluro – Viqueque (13)⁴ no Suku Betano – Manufahi (26)⁵, ho total partisipantes (55). SSD hanesan metodu ne'ebé FM establese no uza hodi dezenvolve peskiza sira ba setór seguransa nia ne'ebé FM adopta, no konklui ba rezultadu peskiza ida ne'e, iha rezultadu peskiza ne'e uza analiza kualitativu.

Iha limitasaun no dezafiu sira ne'ebé hetan durante peskiza ne'e, maibe ne'e la sai obstaklu boot ba FM iha peskiza ne'e. Dezafiu balu kona-bá peskiza ida ne'e maka partisipasaun fetu iha grupou diskusaun (SSD) no entrevista sira, iha mós ambisaun maka'as husi mane maka husu hakarak hetan entrevista. Menus numeru partisipante iha grupu SSD ne'ebé refeleta kona-bá menus atensaun ba fetu sira nia involvimentu iha implementasaun projetu ne'e, liu husi sosialisasaun ne'ebé halo husi Governu sentral to'o autoridade lokal sira. Iha sorin seluk birokrasia nasional ne'ebé la fó biban ba autoridade munisipal tan ho sistema Governasaun ne'ebé sentralizadu.⁶

³ Lista Partisipante SSD iha Suku Labarai (FM. 2020, Agostu, 11)

⁴ Lista partisipante SSD iha Suku Maluro (FM. 2020, Outubro,13)

⁵ Lista partisipante SSD iha Suku Betano (FM. 2020, Dezembro,15)

⁶ Exemplu kazu ne'ebé iha DTP-Cavalima ne'ebé husu atu tenke iha karta kuinesementu antes halo entrevista no iha kazu seluk mak iha DTP-Manufahi nia ne'ebé rejeita atu entrevista. Iha Munisipiu rua ne'e mak projetu ne'e tama ona iha faze implementasaun, Covalima implementa dadaun ona no Manufahi iha faze kompensasaun rai no properiedade ne'ebé hamosu problema barak.

Kontextu Projetu Tasi Mane

Projetu Tasi Mane nia prezensa maka atu dada mina no gas husi Tasi Timor mai halo produsaun iha Timor-Leste⁷, ne'ebé sei hari'i komponente tolu ba industria petroliu nia maka hanesan baze logistika Suai, refinaria no petrokimika iha Betano no LNG iha Beaçõ. Projetu ne'e lokaliza serka 155 km iha kosta sul Timor-Leste.

Suai Suplay Baze (SSB) sei sai hanesan baze lojística ba setor petrolíferu ne'ebé iha kapasidade atu dezenvolve setor petrolíferu doméstiku iha area kosta sul, hamutuk ho indústrias no negócios. Alende ne'e sai sentru indústria petrolífera iha Timor-Leste, hodi presta servisu no hodi asegura lojística no rekursus humanus. Sei iha mós portu marítimu, kompleksu habitacional ida iha Kamanasa, aeroportu, ofisina ba metais pezadus (ka besi todan) no estaleiros (ka doka) ba atu konstrói ka repara ró-ahi. Baze de fonesimentus Suai ne'e, sei sai hanesan ita-nia Baze Industrial Nasional no hanesan mós plataforma lojística ida, atu impulsiona (ka dudu) kria empregu no dezenvolvimentu ekonómiku iha kosta-sul. Baze ida né mós, sei fó apoiu atu estabelese sentru petrolíferu sira, iha Betano ho Beaçõ.

Tuir Programa VIII Governu Konstitusional nia - baze lojística iha Suai ne'e sei serve mos hanesan pontu entrada ida ba jestaun kadeia (ka rede) abastesimentu (ka fonesimentu) atividade husi agrupamentus industriais rua seluk, hanesan, refinaria ho kompleksu petrokímiku ida ho fábrica GNL ida. Baze lojística ida ne'e sei abranje mos: 1) instalasoens terrestres – edifísius ba operasoens nian, armazéns kobertus, mini bazes terrestres, parke armazenajen kombustível nian, depóztus armazenajen bee nian, sistema jestaun ba rezíduus ka lixu, zonas estasionamentu, instalasoens rekreativas no komunitárias, entre buat seluk; 2) Instalasoens marítimas - ponte-kais tolu mak hanesan ponte-kais prinsipál, ponte-kais ba ró-barkasas no rampa (ka fatin) ba embarkasoens dezembarke nian, ne'ebé apoia ho postu atrakasaun ba rebokadores, postu akostajen (ka sadere nian) ba embarkasoens pasajeirus ho kebramar (ka muru boot) ne'ebé liga ba Kosta, husi sátan no fahe laloran, hodi portu ida ne'e bele kalmu (ka hakmatek), seguru no protejidu ba instalasoens iha rai-laran.

Refinaria no Petrokimika - projetu refinaria no petro-kimíka hanesan sentru prosesamentu ba industria petrolíferu mina no gas husi tasi laran ne'ebé maka atu produz iha Timor-Leste. Nune'e mos indústria refinaria no petro-kimíka ne'e sei produz kombustívei sira hanesan gazóel, gasolina, kombustível ba aviaun no alkatraun inklui produktu selu-seluk ba konsumu rai laran, sei exporta mos ba rai-liur hodi aumenta Timor-Leste nia komérsiu husi produktu petrolíferu no gas.

Husi projetu Nova Betano ne'e sei hari'i parke industrial ida, iha ne'ebé indústrias petrokímika no refinasaun sei hamrik iha laran, ho mos sidade administrativa ida, ba indústria petrolífera ne'e. Sidade ne'e sei fornese servisu, kona-bá habitasaun no servisu ne'ebé ita bolu servisu sosiais, hodi sai mós baze foun ida ba empregu iha kosta-sul. Sentru petrokímiku ho refinaria ne'e sei hari'i, husi kooperasaun entre setor públiku ho setor privadu. TIMOR-GAP, maka sei dezempenha papel fundamental, iha

⁷ PEDN (2011-2030) Paj.167.



dezenvolvimentu ne'e. Iha ninia faze inisial, refinaria ne'e sei produz kombustíveis ba konsumu rai laran, hanesan gazóleo, gasolina, kombustível ba aviaun no alkatraun. Nuné mós, produtos selu-seluk, husi refinaria ne'e, sei exporta ba rai liur, hodi aumenta ita-nia komérsiu, husi produsus petrolíferus no gás.

LNG-Beaço Vikeke - estasaun Gás Natural Liquefeito (GNL/LNG), iha Beaço, maka area ne'ebé, gazodutu ba gás natural tama iha ita-nia rain, no iha ne'ebé instalasaun seluk ho GNL sei hamrik, atu prosesa gás. Agrupamentu ida ne'e sei inkorpora: komplexu ba instalasaun GNL nian ho mós sidade foun rua: Nova Beaço ho Nova Viqueque. Aeroportu iha Viqueque, hodi hetan kapasidade atu simu aviões, ne'ebé tama no sai, lori operadores iha instalasaun GNL nian, no bele ona mos funsiona hanesan aeroportu rejional ida.

Atu bele liga aglomerados tolu né, no atu bele apoia kresimentu indústria petrolífera, sei konstrui estrada boot ida, husi Suai ba Beaço. Estrada né sei halo, tuir etapas. Sei desenvolve etapa, ida por ida, tuir nesiedade ekonómika no tuir kresimentu indústria ne'e. Projetu ne'e sei hahu antes 2015 no sei hotu, mais tarde, iha 2020.⁸

Projetu infraestrutura petroliu Tasi Mane ne'e sei iha impaktu sosial ne'ebé boot, tamba sei sai hanesan plataforma impulsadora ida, hodi loke oportunidades trabalhu, jera/kria postus de trabalhu atus-ba atus, hodi apoia desenvolvimentu ekonómiku nasional, no hadi'a maka'as kompetênsias maun-de-obra lokal, iha áreas hanesan fabriku besi-asu, konstrusaun sivil, konstrusaun marítima, enjeñaria mekânica no elétrika, entre buat seluk. Prevê mos katak indústrias naun petrolíferas seluk, hanesan peska komersial, bele mos benefisia ho instalasoens marítimas hirak ne'e. Projetu Tasi Mane ne'e laós kontribui de'it ba indústria petrolífera iha Kosta Sul, maibé mos sei abranje (ka kobre) impaktus ekonómikus, diretus no indiretus, lubun boot ida, iha nível nasional, rejional no lokal, hodi fó benefísius ne'ebé mai husi explorasau rekursus naturais Timor-Leste nian. Produtu Internu Brutu (PIB) nasional ho lukrus sei aumenta husi exportasaun, no mos sei kria oportunidades ba empregu durante konstrusaun ho operasaun infraestruturas ne'ebé koneksas (ka ligadas), aleinde funsiona hanesan katalizador (ka dinamizador) ida ba desenvolvimentu Kosta Sul. Prevê katak sei hamosu to'o 10.000 postus traballu diretus, husi projetu Tasi Mane, no liu 50.000 postus de traballu indiretus sei bele kria ho transformasaun setor petrolíferu, husi faze atual hanesan halo de'it extrasau, ba faze avansada liu ho ona industrializasaun ho kriasaun valór akresentadu (katak sei hamosu tan benefísius seluk no reseitas).⁹

Iha faze implmentasaun projetu ne'e, Governu hahu ho konsultasaun públiku (socializasaun) ho forma Ekipa Konjunta Interministerial (EKI) ne'ebé kompostu husi Ministeriu Petroliu Minerais - Timor GAP, Ministeriu Justica-Sekretariu Estadu Teras e Propriedade (SETP), Sekretariu Estadu Mei Ambiente (SEMA), Ministeriu Agrikultura e Pesca (MAP), Ministeriu Interiór – Polisia Nasional Timor-Leste (PNTL). Faze ne'e implementa dezde tinan 2011 no to'o iha tinan 2018 Governu halo lansamentu ba identifkasaun rai no propriedade ba area ne'ebé afetadu projetu Tasi Mane ne'ebé

⁸ PEDN 2011-2030. Paj. 169.

⁹ Relatoriu Governu (2018) Programa VIII Governo Konstitusionál ba periodu 2018-2023. Paj.71-74).

hala'o iha tinan 2018.¹⁰ Komponente husi SSB – Suai, implementa ona maka auto-estrada no aero portu Suai. Refinaraia no petromikia tama iha faze libertasaun rai no properiedade, pagamentu halo ona iha tinan 2019 maibe parcelas balu Governu halo disputa hasoru komunidadade sira. Iha LNG-Beaço iha hela faze identifikaun rai no properiedade.

Estudu Kazu Covalima

1. Rezolusaun ba disputa sira liga ho rai

Feto sira iha area afeta husi SSB hato'o katak rezolusaun ba konfliktu ne'ebé mosu no disputa rai ho forsa no obrigatoriu. Iha kazu ne'ebé indentifika, iha fetu ida sente trauma no tauk tamba aproximasaun ne'ebé Governu uza atu rezolve disputa rai ne'ebé liga ho projetu ne'e. Iha presau no ameasa ne'ebé halo husi forsa seguransa ne'ebé apoiu ba EKI. Kazu ne'ebé FM identifika inan feton ida hela ho trauma no tauk tamba presau no violênsia ne'ebé nia hetan bainhira nia tenta atu buka hatene lolos informasaun kona-bá kustu kompensasaun ba nia rai no plantasaun ne'ebé afetadu husi projetu auto estrada.

Nune'e mós iha ekspresau ne'ebé hatudu husi komunidadade afetadu (feto sira) durante SSD iha Suku Labarai, fetu sira ko'alia ho ekspresau tauk wainhira husu kona-bá prezensa PNTL iha projetu Tasi Mane, ne'ebé refeleta kona-bá presau no tauk ne'ebé sira hasoru. Maske OPS ne'ebé prezensa iha SSD ne'e husu atu fetu sira ko'alia avontade tuir saida deit maka sira sente no hasoru durante implementasaun projetu auto estrada no aeroportu, maibe fetu sira nonok hodi hateke malu, tauk atu ko'alia sai. Depois autoridade lokal no OPS sira kontinua enkoraza, maka fetu ida tenta ko'alia sai katak "sei polisia rona ami nia lian, tauk polisia atu buka tuir ami".

Fetu sira mós halo komparasaun ho prezensa husi Oficial Polisia Suku (OPS) ne'ebé ho aproximasaun polisiamentu komunitariu ne'ebé diferente ho PNTL seksaun seluk ne'e dalabarak sira hare agresivu tebes, iha atausaun ne'ebé halo hasoru problema ruma iha komunidadade nia le'et. Nune'e fetu sira husu atu PNTL uza meius polisiamentu komunitariu hodi aproxima problema. Tamba kuaze maioria husi intervista pesoal no SSD ho komunidadade-fetu afetadu sira hato'o katak durante implementasaun projetu ne'e iha deit maka prezensa maximu polisia husi Batalaun Ordem Públiku (BOP), no dalaruma Task-Force, sira nia atausaun ba ho agresivu no laiha aproximasaun polisiamentu komunitariu ne'ebé sira halo hodi rezolve problema. Fetu sira mós hatete dalabalu atusaun sira nia ba konfliktu favorese liu ba kompañia sira.

Aleinde aproximasaun sira ne'ebé ho violênsia no agresivu. Iha mós des igualdade ne'ebé mosu kona-bá direitu kompensasaun nia. Iha ne'ebé mane sira maka benefisiu liu ba direitu kompensasaun duke fetu sira, laiha razaun ne'ebé forte tamba sa fetu la simu direitu hanesan. Kazu ne'ebé FM identifika disputa rai entre mane ne'ebé na'in ba rai ho bei oan fetu na'in ba plantasaun. Tuir solusaun ne'ebé EKI halo iha toos laran durante sei sukat rai, sira decide katak rai ne'e partense ba mane no bei oan nia, sei simu direitu

¹⁰ Relatoriu Ministeriu Petroliu Minerai (2020) Posesu do Governasaun MPR 22 Juñu 2018 – 22 Maiu 2020.



osan ba rekompensasaun atu fahe hanesan, ho prezensa husi polisia. To'o simu osan bei oan feto simu deit (\$ 4000) no nia avo (mane) simu (\$10.000). Maske nune'e kazu la rezolve tamba laiha ema ida maka atu rezolve.¹¹

Iha sorin seluk afetadu sira mós hato'o katak sira simu hotu tiha osan maka foin hare Governu públika tabela kustu ai-horis sira ne'ebé sei selu kompensasaun, ne'ebé hamosu mos protesta maibe ikus mai husik hela deit problema no la rezolve. Vitima feto ida haktuir "Foufoun sira aprezena tablele folin kompensasaun, hau kritika kedas, tamba hau la simu saida maka sira halo ne'e, hau dehan ba sira hau nia to'os boot no nakonu ho ai horis, maibe hau simu deit osan oituan, la tuir tabela folin ne'ebé fó sai ikus ne'e, lolos ne'e antes sukat rai ne'e tenke fó ona lista ne'e para ami bele hatene tuir". Vitima hato'o kazu ne'e wainhira partisipa SSD ne'ebé FM realiza iha Suku Labarai.¹²

2. Lakon rai, hela fatin no atividade agrikola

"Hau sente triste liu tamba hau nia uma lakon tiha deit, hau nia oan nia uma ne'e kalen, nia simu to'o ona uma, hau nia uma duut be'e lakon tiha deit ne'e. iha hau nia moris tomak ne'e hau la kontente liu". (Komunidade afetadu aero portu Suai".

Iha area Tasi Mane rai ne'ebé potencia atividade agrikola nia, rai bokúr ne'ebé sei dezenvolve sei fó moris ne'ebé sustentavel ba vida agrikola nia. Alende rai bokur, iha tasi ibun ne'ebé furak sai mós hanesan potencia turizmu. Nune'e Governu presiza mós iha planu ne'ebé diak atu enkaixa asuntu sira ne'e. Ho prezensa projetu ne'e comunidade sei lakon rai, hela fatin no mós ba atividade agrikultura.

Ho prezensa projetu infraestrutura petroliu ne'e comunidade sira husik nia hela fatin, rai ba atividade agrikola sira no hakiak animal. Tuir MAP Suai katak, rai agrikola ne'ebé partense ba projetu SSB ne'ebé sei lakon hotu maka Zumalai no Salele. Maske nune'e laiha ameasa ba vida comunidade nia tanba sira balu rai rezerva iha foho, ne'ebé bele substitui. Suai rai potencial ba agrikultura ne'ebé abandona hela presiza deit rekursu bé naton hodi utiliza rai sira ne'e ba dezenvolve agrikultura. Potensia sira ne'e husi Beco, Zumalai to'o Salele maibe presiza maka dezenvolve kondisaun infraesturura ne'ebé ajuda atu dezenvolve to'os no natar. MAP Suai relata katak difikuldade iha setór agrikultura no peska maka infraestrutura báziku ba bé irigasaun ba natar sira, peskadór sira sei utiliza ró manual hodi luku tasi, comunidade agrikultór sira seidak iha kuinesementu ba agrikultura abansadu, no falta insentivu atu motiva esforsu ba kresimentu produsaun iha rai laran, no ne'e ladun afeta maka'as husi projetu Tasi Mane nia.¹³

Iha prespetiva diferensia husi Governu ho comunidade afetadu sira. Faktu balu iha area aeroportu Suai, comunidade balu lakon tiha nia direitu ba uma ne'ebé hari'i 'Bairo Foun' Holbelis. Iha levatamentu dadus, antes Governu sobu sira nia uma, comunidade afetadu hotu nia uma rejistu, katak uma ne'ebé sobu sei selu ho uma, hanesan evidensia ida

¹¹ Cardoso, Eduarda – Comunidade afetadu (2020, 07, 27) Entrevista Pesoal.

¹² SSD iha Suku Labarai (11-08-2020)

¹³ Da Silva, Fernando - Xefe Departamentu Agrikultura MAP Covalima (28-07-2020) Entrevista Pesoal



ne'ebé sira kaer, dadus levantamentu ne'ebé Governu entrega ba sira. Maibe depois konstrusaun ne'e ramata comunidade balu la hetan uma. Tuir dadus ne'ebé comunidade hato'o ba FM maizumenus iha familia uma kain (5) maka seidak hetan uma iha bairu foun ne'ebé Governu selu ba comunidade nia uma.

Iha inan-feto ida obrigadu tenke hela hamutuk ho familia seluk hodi hein dezisaun Governu nia bainhira maka bele konstrui uma ba nia, no nia hato'o katak problema ne'e hato'o bei-beik ona Governu liu husi autoridade lokal no mós diresaun EKI iha munisipiu, maibe laiha dezisaun ne'ebé klaru. Nune'e iha tempu ida iha vizita husi Ministru Petroliu Rekursu Minerais nia, vitima sira tenta atu hasoru Ministru, hakarak hato'o direita nia problema "uma" ba ministru maibe iha ema balu "autoridade" satan nia hodi nia labele hasoru ministru.¹⁴

Nune'e mós konstrusaun auto estrada iha Suai ne'ebé finaliza ona Fatukahi to'o Zumalai ho kilometru 30,3 (sei kontinua to'o Beço) sai mos bareira ba comunidade sira hodi asesu ba merkadu, eskola, no atividade agrikola sira. Liu-liu ba ema ho difisensia sira, feto, labarik no katuas-ferik sira. Tamba la iha dalan pasajen alternativu ba sira no tenke la'o kuaze kilometru lima hodi hakat ba estrada sorin. Balu obrigadu tau ai utiliza hodi hakat ba estrada sorin.

Aleinde ne'e fó mos impaktu ba seremonia funeral, antes ne'e comunidade sira facil transporta mate isin ba rate ho distansia ne'ebé besik, ho auto estrada comunidade sira tenke hulan haleu auto estrada foin ba hakohi mate. No iha tempu udan comunidade aldeia Holbelis no Meop afeta inundasaun maka'as, bé tama uma comunidade nian, edifisiu públiku (eskola no sentru saúde, no estraga plantasaun comunidade nia).¹⁵

¹⁴ Amaral, Isabel – Comunidade afetadu (2020, 07, 29) Entrevista Pesoal.

¹⁵ SSD iha Labarai (2020.08.11)

Estudu Kazu Viqueque

1. Sosializasaun husi Governu ba comunidade afetadu sira

“Hau la hatene kona-bá projetu ne’e, iha enkontru kona-bá LNG ne’e mane deit maka partisipa, feto sira la hetan konvite, sira ne’ebé mai ne’e, sira tama ba dapur ajuda hahan ba ema sira ne’ebé mai halo sosializasaun ne’e, dalabarak mós sira dehan feto sira ba atu halo saida” (SSD iha Suku Maluro).

Iha konsultasaun públiku (sosializasaun) ne’e halo dalabarak ona ne’ebé hala’o husi Governu liu husi EKI ne’ebé ba iha comunidade afetadu sira hodi esprika polítika Estadu nia hodi hari’i projetu petroliu Tasi Mane, impkatu meu ambiente no umanu, maibe feto sira seidak infomadu lolos kona-bá pojetu ne’e rasik. Tuir relatóriu Ministeriu Petroliu no Minerais, faze konsultasaun ne’e ramata ona, tama ona iha faze libertasaun rai no properiedade comunidade afetadu nia.¹⁶ Maske nune’e maioria husi feto hato’o katak sosializasaun ne’ebé Governu halo ne’e maioria involve deit husi mane sira, hetok liutan mai husi autoridade komunitaria, postu no munisipal ho EKI, feto sira la hetan informasaun atu hola parte enkontru sira.¹⁷

Feto sira tenta ba to’o iha fatin enkontru maibe depois to’o iha ne’ebá feto nia servisu maka ba iha dapur hodi prepara hahan ba ema sira ne’ebé mai halo sosializasaun. Sira mos hato’o katak iha Suku Maluro ne’e, kuandu iha informasaun ruma atu koalia kona-bá LNG nia, iha ona ekipa Task-Force ne’ebé hili tiha ona, ne’e maka atende deit, depois maka informa fila fali ba comunidade sira. Komunitade bai-bain labele atende enkontru sira ne’ebé ko’alia kona-bá projetu Tasi Mane nia.¹⁸

Nune’e feto sira la informadu lolos kona-bá projetu infraestrutura petroliu Tasi Mane, tamba dalabalu mós informasaun sira ne’e rai deit iha ekipa Task-Force iha Suku ne’e. Ida ne’e rekuinese husi Xefe Suku rasik, wainhira SSD ne’ebé FM hala’o iha Suku Maluro. Feto sira foka maka’as kona-bá la involve iha sosializasaun projetu Tasi Mane nia, ne’ebé indika lideransa komunitaria sira. Ho klarefikasaun husi Xefe Suku rekuinese katak buat sira ne’ebé feto sira levanta ne’e los, iha duni ekipa Task-Force ba projetu LNG ne’ebé iha mós partispante feto iha laran, maibe nia partisipasaun la ativu.¹⁹

Feto balu sente tauk ba sira nia moris aban bainrua nia tamba ho informasaun ne’ebé la klaru kona-bá projetu Tasi Mane ne’e. Iha Feto sira hakarak sira nia oan sira nia futuru wainhira projetu ne’e implementa ona.

2. Proposta comunidade afetadu

To’o agora seidak iha identifikasaun lolos kona-bá natár, to’os, plantasaun hirak maka sei destrui iha Beaço. Projetu LNG ne’e sei okupa rai hektares 650 iha suku Maluro tomak

¹⁶ Relatoriu Ministeriu Petroliu Minerais (2020) Posesu do Governasaun MPR 22 Juñu 2018 – 22 Maiu 2020.

¹⁷ Soares, Francisca – Komunitade afetadu (13.10.2020). SSD iha Suku Maluro

¹⁸ Soares, Ricardina – Komunitade afetadu (15.09.2020). Entrevista Pesoal

¹⁹ Amaral, Francisco – Xefe do Suku Maluro (2020.10.13) SSD iha Suku Maluro.



inklui parte sorin area suku Uma Wa'in Kraik nia. Komunidade afetadu sira sei desloka husi rai tetuk ba hela iha foho leten, fatin ba konstrusaun "Bairo Foun" ne'ebé Governu identifika ona. Kumunidade sira hato'o katak sira sente tauk ba sira nia futuru tamba, wainhira projetu ne'e implementa maka sira sei lakon uma, rai (inklui mos to'os no natar), plantasaun no mós fatin peska.

Governu halo ona identifikasaun fatin foun ne'ebé atu desloka komunidade afetadu sira. Fatin ne'e lokaliza iha rai lolon no iha foho leten. Komunidade sira iha Beaço hato'o katak sira abitua ona rai tetuk, ho vida agrikultura nia maka hanesan halo to'os, halo natar no peska. FM nia observasaun ba iha fatin ne'ebé Governu indika ne'e, fatin ne'e estratejiku atu halo sidade "suku", foun maibe la iha espasu atu komunidade sira bele dezenvolve vida agrikultura liu-liu fatin ba halo natár, no sei husik mós vida peska nia, tamba dook husi tasi.

Ho previzaun ne'e, komunidade afetadu sira husu atu bele iha atensaun Governu ba sira nia poblema sira ne'ebé liga ho uma, rai, no plantasaun sira. Iha futuru instalasaun planta LNG implementa iha Beaço, komunidade sira hato'o pruntu kontribui, maibe Governu tenke halo tratamentu ida ne'ebé dignu ba sira, liu-liu feto no labaraik sira ne'ebé iha potencia sai sofre ba impkatu husi projetu ne'e. Nune'e asuntu kompensasaun ne'ebé komunidade hato'o maka kompensasaun ba sira nia uma lisan, no rate ne'ebé sira konsidera hanesan naha todan ida ne'ebé Governu labele husik deit ba sira leten, wainhira projetu ne'e implementa. Komunidade afetadu husu rate ida tenke selu ho osan ne'ebé ida ho kustu \$ 10.000, ne'ebé tuir sira katak ne'e kalkulu ona rekonsturusaun.

Bazeia ba entrevista no diskusaun ho komunidade afetadu feto sira identifika projetu ne'e sei afeta propriedade komunidade nia hanesan rai, uma, uma-lisan, rate, no plantasaun. Aleinde afeita uma, rai agrikultura, hortikultura no peska, sei afeita mós fatin ba animal hakiak, inklui uma lisan (+-25) no rate (+- fatin 5) ne'ebé tama iha area afetadu LNG nia. Komunidade afetadu ho autoridade lokal sira hato'o katak sira sei aseita kompensasaun husi Governu atu husik fatin ne'e ba projetu sei Governu fó kompensasaun halo ho transparente no kalkulasaun kustu halo tuir lei ne'ebé iha "tabela folin" EKI apresenta ba komunidade. Sira mós hato'o katak iha presiza mós esplika kona-bá uma dapur, uma lisan no rate nia presu, tamba ne'e hanesan kestaun ne'ebé todan liu, no bainhira muda sai tenke halo tuir rituais kultural.²⁰

Dadus Sensus 2015, Suku Maluro iha populasaun 816, mane 388 no feto 428 ho total uma kain 181 ka feto 49, 41% mane 50, 59%.²¹ Governu presiza kria uluk kondisaun antes muda komunidade sai husi hela fatin. Iha impaktu ba feto sira bainhira muda husi fatin ida fatin seluk. Nune'e autoridade lokal no feto sira husu hakarak kria uluk kondisaun baziku hanesan uma/hela fatin, bé-mós, saneamentu baziku, eletrisidade, edifisiu eskola no sentru saúde. Kondisaun hirak ne'ebé bele fó garantia no evita risku ba feto sira, liu-liu inan isin rua sira, labarik, no mós ema ho deficiente sira, no sei la aseita muda obrigatoriu.²²

²⁰ SSD iha Suku Maluro (13.10.2020)

²¹ Relatoriu Sensus (2015) – Sensus Fo Fila Fali Suku Maluro Munisipiu Viqueque

²² Amaral, Fransisco – Xefe do Suku Maluro (2020. 10. 13) SSD iha Suku Maluro.

Iha sorin seluk feto sira mós preokupa kona-bá dezisaun Governu nia ne'ebé la serteza implika planu dezvoltamentu suku, no eskola sira. LNG aleinde impede planu dezvoltamentu suku impede mós oan sira nia estudu, tamba Beaço oan nain 25 (mane 17, feto 8) maka tuir ona kursu espesializada iha Tibár kona-bá servisu setór petroliu maibe to'o agora laiha poliítika ne'ebé serteza ba LNG, maske formadór hirak ne'ebé barak maka lakon ona sira nia estudu iha universidade.

Estudu Kazu Manufahi

1. Kompensasaun ne'ebe Governu fó no halo disputa ba comunidade nia rai

“Ema nia rai hadulas ami ne'e Governu selu, agora hau nia rai oituan oan iha klaran ne'e, Governu la selu atu dudu deit, ami comunidade sira ne'e la'os Governu nia ema, hau feto ida tan maka Governu tenta atu hadau deit hau nia rai, Estadu ne'e hanoin halo nusa ba nia povu ida ne'e”. (Olinda Da Cruz-Komunidade afetadu Refineria no Petrokimika)

Asuntu kompensasaun maka esperansa comunidade nia ba Governu atu garante sira nia moris iha futuru, depois comunidade nia rai, natar no to'os, plantasaun, ai-horis inklui fatin lulik sira ne'ebé comunidade oferese atu implementa projetu nasional refere. Comunidade afetadu (feto) sira husu la bele hamosu tratamentu deskriminativu iha implementasaun rekompensasaun maibe sira husu Governu Timor-Leste, partikularmente Ministériu Petroliu no Rekursu Minarai atu fo kompensasaun ne'ebé bele garantia sustentabilidade moris comunidade iha futuru.

Faze implementasaun kompensasaun hahu ona, Governu la fó esplikaun kle'an kona-bá modelu kompensasaun oinsa maka atu fo ba comunidade afetadu sira. Comunidade sira senti tauk lakon sira nia direitu ba kompensasaun. Exempulu kazu ne'ebé hatudu ona iha Sentral Eletrika Betano, Governu la fó kompensasaun ba comunidade maibe kompañia sira maka fo fali kompensasaun.²³ Iha lisaun ne'ebé maka hanesan uluk comunidade balu lakohi sai atu harii uma MDG nia, ikus tiha maka rezolve.²⁴

Iha kazu atual Governu esplika iha sosializasaun haruka comunidade afetadu sira ba halo indentifikasaun, Governu halo verifikasaun to'o iha realizasaun pagamentu comunidade nia rai selu deit sorin ne'ebé uza hela halo to'os no ai horis iha laran, rai ne'ebé mamuk Governu hatama tiha ba rai Estadu. Ikus comunidade barak la konkorda ho dezisaun ne'e EKI aplika, kazu ne'e to'o ohin loron iha hela inserteza nia laran.

Governu-EKI uza osan obriga comunidade comunidade simu kompensasaun, maske iha Konstituisaun RDTL artigu 54 garante kona-bá diretu indiminizasaun tenki hatur lolos tuir lei haruka. Husi ida ne'e comunidade balu ne'ebé iha rai ki'ik no laiha rai iha fatin seluk sira rejenta simu kompensasaun uluk antes Governu apresenta razaun kona-bá ko'a sira nia rai balu ba Estadu. Iha ne'ebé maizumenus comunidade afetadu 27 parcelas maka la aseita Governu atu ko'a sira nia rai, maske iha maioria afetadu simu ona kompensasaun.

²³ Relatoriu FM (2013) Projetu Refineria no Petrokimika: Mega Projetu ka Mega Ameasa. MNL. Nú.58.

²⁴ SSD iha Suku Betano (2020. 12.15)



Entre sira ne'ebé la aseita ko'a ne'e iha feto afetadu na'in tolu ne'ebé FM konsege dada lia (intervista) ho sira hato'o katak sira nia rai ki'ik utiliza deit ba halo uma nia, rai eransa ne'ebé husik husi avo ba oan no sei ba bei oan sira, sira laiha rai iha fatin seluk, nune'e sira mantein defende sira nia direitu katak Governu tenke selu kompletu maka sira entrega se la'e maka Governu la bele uza.²⁵

Governu dehan rai ne'ebé aihoris laiha ne'e, rai abandonadu, iha ai horis iha laran ne'e maka selu, ai horis la iha ne'e la selu, dehan ne'e tama ba Estadu nia, hau hanesan feto foun ida ne'ebé rai ne'e hau nia banin entrega ba hau ho hau nia la'en nia, hau dehan ona metru ida mós la ko'a, ko'a ne'e ba saida nia, rai ne'e hau nia direitu. Hau ho hau nia banin ami fahe malu tiha ona rai kiik (27x100) deit para atu halo uma, hau nia bain nee feto faluk. Tamba Governu presiza rai ne'e ami prontu fó maibe tenke selu ho kompletu para osan ne'e to'o mai ami tenke sosa fali rai foun, halo uma no halo to'os ba oan sira iha futuru.²⁶

Governu la fó razaun ne'ebé fundamentu ba comunidade nia rai ne'ebé tenke ko'a tiha sorin ba Estadu.²⁷ Ho nune'e comunidade sira ne'ebé iha rai ki'ik la aseita atu oferese balu ho gratuita ba Estadu, ho razaun katak depois sira nia rai entrega tiha ba projetu la iha tan rai iha fatin seluk ne'ebé utiliza halo to'os, no husik ba oan sira aban bainrua atu hela. Sira husu Governu tenke selu kompletu tuir tabela folin kompensasaun hodi sira buka sosa fali rai iha fatin seluk atu utiliza. Iha mós duvidas balu ne'ebé feto afetadu husu Governu atu esplika klaru, iha ne'ebé sira konsidera la justu tamba iha foho Governu obriga fó kompensasaun ba comunidade agrikultór sira nia rai ho deit folin \$3/1m², no tenta atu foti gratuita tan, maibe rai balu iha kapital Dili, ema riku nia, fa'an ba \$30/1m². Nune'e presiza halo klafikasaun ne'ebé klaru no justu hodi asegura sidadaun sira nia direitu hanesan ba rai no properiedade tuir lei, ne'e hanesan hatuur ona iha Konstituisaun RDTL.²⁸

2. Feto nia involvimentu iha servisu

Kampu servisu nu'udar mehi aas no promesa Governu nia atu fó oportunidade comunidade afetadu sira atu hola parte no servisu iha projetu ne'e. Tuir espetativa Governu nia preve katak husi projetu Tasi Mane sei hamosu to'o 10.000 postus de traballu diretus, no liu 50.000 postus de traballu indiretus sei bele kria ho transformasaun setor petrolíferu, husi faze atual hanesan halo de'it extrasau, ba faze avansada liu ho ona industrializasaun ho kriaun valór akresentadu (katak sei hamosu tan benefisius seluk no reseitas). Projetu ne'e sei influencia dezempeñu ekonómiku ne'ebé boot liu ba País, hanesan rezultadu husi dinamizasaun setóres industriais seluk. Governu no husi benefisiárius privadus sira, maka sei sai hanesan partisipante investimentu.²⁹

²⁵ Fernandes da Costa, Amelia – Comunidade Afetadu (2020. 11. 24) Entrevista Pesoal.

²⁶ Da Cruz, Olinda- Comunidade afetadu (2020.11. 24) Entrevista Pesoal.

²⁷ FM tenta bei-beik atu husu klarifikasuan asuntu ida ne'e ba DTP Munisipiu Manufahi nia maibe rejetea atu entrevista.

²⁸ Tilman, Francisca - Diretóra Delegasaun Territorial PDHJ Munisipiu Same (2020.11.15) Entrevista Pesoal

²⁹ Programa VIII Governo Konstitusionál ba períodu 2018-2023

Maske nune'e mehi ne'e sei hela ba mehi. FM nia monitorizasaun ba prosesu sira ne'ebé hahu ona maka hanesan husi konsultasaun públiku, indentifikasaun rai no properiedade no atividade seluk ne'ebé hahu dadaun ona husi Timor Gap no Timor Resource. Feto sira ne'ebé hola parte iha entrevista no SSD ne'e indika katak prosesu sira ne'ebé halo ona pelu kontrariu ho promete ne'ebé Governu halo iha tempu sosializasaun ba comunidade afetadu sira.

Feto sira hato'o katak servisu sira ne'ebé la'o ona menus involve husi comunidade afetadu sira. Sira sente hanesan tiha bainaka, iha ema seluk mai servisu iha sira nia rai. Exemplu balu ne'ebé sira relata maka hanesaa; tein ba kompañia no traballadór sira ne'ebé kompania presiza, balu lori ema husi munisipiu no balu husi nasional, maske servisu sira ne'e comunidade afetadu iha hela grupu kona-bá tein, sira iha esperensia no iha negosiu hanesan restaurante sira ejiste hela.³⁰ Ida ne'e pelu kontrariu ho iha realizasaun no promete ne'ebé Governu halo iha sosializasaun, katak servisu saida deit maka iha area projetu Tasi Mane sei fó perioridade uluk ba afetadu sira, karik ema afetadu la to'o atu servisu maka loke oportunidade ba sira husi munisipiu seluk.

Sira mós hato'o katak iha vaga ruma ne'ebé loke iha ne'eba, dehan sira ne'ebe kompete ne'e sira ne'ebé hatene lian Ingles, maibe ema hotu bele kompete maibe rezultadu teste ne'e sira familia deit maka liu.³¹ Durante ne'e laiha formasaun, Governu mai esplika dehan fornese hahan sira ne'e Betano oan maka prepara, maibe implementa sira liga deit maka sira nia familia sira, no kazu ida ne'e mosu protesta husi comunidade lokal sira.³²

Aleinde ida ne'e, feto sira mós husu atu Governu konsistente ho nia promessa no tenke dezenvolve planu ruma ba feto nia partisipasaun iha implementasaun projetu ne'e. Sira husu tenke fó perioridade ba sira ne'ebé afetadu, iha ne'ebé presiza formasaun hodi hasa'e kapasidade feto nia iha area sira ne'ebé sira bele kontribui. Feto sira iha Betano hato'o katak, oras ne'e sira involve ona iha organizasaun oin-oin liu-liu grupu kooperativa sira hanesan hakiak manu, kuda modo, restaurante nomos rai no foti osan, maibe difikuldade ne'ebé hasoru maka falta kondisaun, menus facilidade, finanseira, no menus kuinesmentu iha jestaun hodi dezenvolve sira nia atividade. Nune'e sira husu Governu presiza fó atensaun ba asuntu ida ne'e.³³

Feto no Seguransa

1. Impaktu ba ema, animal no ambiente

Rai nu'udar asuntu importante ida ba comunidade atu bele sustentabiliza moris. Iha rai maka kriasaun hotu-hotu bele buka, hala'o no salva ninia moris. Laiha rai maka comunidade sira la bele hala'o atividade agrikula hodi sustenta moris tamba nu'udar comunidade agrikultor moris dependensia ba to'os no natar.³⁴ Tuir planu Governu nia

³⁰ Tilman, Josefina - Xefe Grupo NGO HAFOTI Same (2020. 11. 23)

³¹ Candelas, Lourença – Comunidade aldeia Be Metan (2020. 12. 15) – SSD iha Suku Betano

³² SSD iha Suku Betano (2020, 12. 15)

³³ Dias Igilda, Maria – Delegada (2020. 12. 15) SSD iha Suku Betano.

³⁴ Relatoriu FM (2010) - Disputa Rai ho Estabilidade Nasional Iha Timor-Leste. MNL, Nú. 8.



projetu Tasi Mane ne'e sei kobre area kosta sul ne'ebé husi Suai, Betano to'o Beaço ne'ebé potencia ba dezvoltimentu setór agrikula.

Agrikultura nu'udar setór importante ba futuru Timor-Leste, atu sustenta no fornese meus subsistencia ba povu maioria iha tempu naruk. Maibe prezensa husi projetu Tasi Mane sei destroi rai bokur inklui plantasaun no ai-horis ne'ebé durante ne'e fornese nesesidade moris ba povu maioria. Nune'e sei hamate sustentabilidade ekonomia husi atividade agrikultura.³⁵

Tuir monitorizasaun FM nia, projetu Tasi Mane ne'e lokaliza keda iha rai produtivu nia leten, rai ne'ebé merese ba produsaun agrikula. Iha ne'ebé dadaun ne'e rai refere nakonu plantasaun sira ho valor ekonomiku, ne'ebé fo rendementu ba comunidade nia moris. Nune'e mós rai bokur no rai tetuk ne'ebé potencia boot ba produsaun ekonomia lokal. Aleinde rai produtivu, rai iha area refere mos identifikadu nu'udar fatin hakiak animal sira ne'ebé comunidade uza durante tempu naruk nia laran. Iha konstrusaun projetu ne'e, sei destroi animal nia fatin, ai-han sei mate hotu inklui animal tanba laiha ona fatin no ai-han. Aleinde ne'e, tasi mós sei foer ne'ebé fó nia impaktu maka'as ba, ema, no mós atividade turizmu iha area ne'e.³⁶

Impaktu seluk maka ba ambiental husi industria boot ne'e rasik. Governu no kompañia ne'ebé kaer obra ne'e prezisa halo estudu impaktu ambiental antes implementa industria ne'e, lisensa ambiental prezisa sosializasa ba comunidade afetadu sira, hodi nune'e bele antesipa impaktu negativu sira ba meu ambiente no umanu.³⁷

Nune'e rai Kosta-Sul nu'udar rai tetuk no rai produtivu ne'ebé sai potencia boot ba produsaun agrikula. Bainhira laiha planu diak ba rai produtivu sira maka sei la reduz dependensia ekonomia estranjeiru, konsekuensia rai bokur sira ne'e sei kemadu (maran) no loron ida mina maran maka Timor-Leste bele krize ekonomia.³⁸

2. Formasaun no kampu servisu

Intersante atu hare oinsa maka fetu sira involve ona servisu ba projetu no sira nia prepetiva rasik atu involve servisu ba Tasi Mane. Identifika katak iha espetativa fetu nia atu servisu iha projetu Tasi Mane a'as tebes, kuaze fetu hotu partisipa iha peskiza ne'e hato'o katak sira hotu hakarak servisu ba projetu, ne'e konsidera ne'e hanesan oportunidade ne'e diak atu sira bele dezvoltolve sira nia ekonomia, maibe dezafiu ba sira maka menus kapasidade, tratamentu la igual kona-bá oportunidade vaga ne'ebé fó ba fetu sira.

Iha Suai fetu maka iha direitu liu iha familia nia laran. Maibe ida ne'e la aplika iha realidade liu-liu kona-bá foti dezisaun sira. Iha entrevista ne'ebé FM halo ho fetu no

³⁵ Relatoriu FM (2013). Projetu Suai Supply Baze: Dezvoltimentu Ka Ameasa. MNL. Nú.57.

³⁶ Das Regras Viana, Joni – Komandante PNTL Munisipiu Manufahi (2020. 11. 24) Entrevista Pesoal.

³⁷ Relatoriu FM (2013) Projetu Refinaria no Petrokimika: Mega Projetu ka Mega Ameasa. MNL. Nú.58

³⁸ Relatoriu FM (2013) Projetu Refinaria no Petrokimika: Mega Projetu ka Mega Ameasa. MNL. Nú.58.

lideransa feto nia iha organizasaun sosiedade sivil sira hatete katak feto iha direitu atu foti dezisaun ne'e maibe ida ne'e susar tebes atu akontese iha Suai. Mane sira sempre hakarak dumina, dala barak sira lori ho razaun kultural ne'ebé hatete katak feto kuandu ko'alia liu mane sira maka sira nia moris badak (mate). Ho razaun sira nune'e halo feto sira lakon sira nia direitu ne'ebé lolos hetan maibe mane sira uza utiliza difisienesia ne'e iha hodi halo eksplorasau. Exemplu kazu iha Suai - oportunidade servisu ne'ebé fó ba feto sira desde ukun-an to'o ohin lora vaga ne'e loke iha administrasaun públiku oportunidade ne'ebé fó ba feto maximu maka ema na'in rua deit. Nune'e organizasaun feto sira husu prezisa aumenta oportunidade ba feto sira hodi kombate marjinalizasaun feto husi dezvoltamentu.³⁹

Governu tenke loke kursu vokasional besik ba comunidade ajuda liutan kapasidade/skill feto sira nia atu hatan ba nesiedade servisu sira iha projetu Tasi Mane nia. Formasaun ne'ebé hala'o tenke prepara ema ba priense merkadu traballu ne'ebé iha. Tamba iha exemplu balu iha Suai, servisu ne'ebé fetó sira halo ba projetu ba kuda du'ut iha estrada ninin auto estrada. Enkuantu formasaun ne'e sira ramata ona maka lian Ingles, komputadór no kondutór, inklui formasaun seluk tan, maibe depois projetu la'o tiha sira labele hetan servisu sira tui area formasaun ne'ebé sira simu ona. Obstaklu seluk maka sentru treinamentu vokasional ne'ebé dook husi sira, susar feto sira atu dezvoltave-an.

Iha kazu Suai - iha feto na'in (5) husi sira seluk ne'ebé ramata ona kursu iha Sols. Iha SSD sira hato'o katak depois tui kursu ne'e ramata sei kontinua ba iha Filipina no Kambodia tui promete ne'ebé Governu fó, maibe to'o simu tiha sertifikadu, sira abandona. Liutan ida ne'e promessa seluk maka sira ne'ebe ramata kursu ne'e sei hetan servisu lalais tamba ho assinatura Ministru Petrolu Minerais nia. Laiha vaga ruma ne'ebé hodi sira bele kompete ba servisu tui formasaun ne'ebe sira simu ona. Nune'e sira alega katak buat sira ne'e hanesan "promesa deit" atu Governu foti sira nia rai ba pojetu. Sira mos hato'o liutan sira simu ona formasaun oin-oin, balu kursu kona-bá hada batako, kona-ba tein, no kona-ba administrasaun, maibe projetu konstrusaun auto estrada no aero portu, traballadór sira ne'e servisu ne'e kompañia sira lori husi liur maka mai.⁴⁰

Iha sorin seluk, organizasaun feto sira iha munisipiu hato'o katak dezafiu boot liu ba feto atu involve iha projetu tasi mane nia, feto nia kuinesementu rasik, comunidade nia kuinesementu kona-bá igualdade jeneiru no ita nia kultura rasik.⁴¹ Maske feto sira iha kapasidade wainhira atu sai ba xefe aldeia no xefe suku kultura la fo dalan feto atu assume kargu sira nune'e.⁴² Tui comunidade nia prespetiva katak feto ne'e ba atu halo saída, tamba sira so hatene deit maka feto nia servisu dapur nia. Vaga ruma la tau konsidera ba feto tamba ho dezafiu kultural ne'ebé iha feto nia CV ba ne'e tau tiha iha

³⁹ De Jesus, Antonia – Responsavel Justice Formal no Assistencia ba Feto FOKUPERS Suai (2020. 07. 28) Entrevista Pesoal.

⁴⁰ SSD iha Suku Labarai (2020. 08. 11)

⁴¹ Fernandes da Costa, Paulina – Coordenadora uma paz Manufahi (2020. 11. 25) Entrevista Pesoal.

⁴² Guterres, Luciana – Presidente Asosiasaun Feto Munispiu Vikeke (2020. 16. 09) Entrevista Pesoal.

okos. Ida ne'e mós dezafiu seluk maka hare ba kor partidu. No hirak ne'e sai tiha bareira ba fetosira atu partisipa iha projetu ne'e.⁴³

Involvimentu fetosira iha projetu Tasi Mane laiha informasaun ne'ebé serteza durante projetu ne'e la'o. Maibe durante ne'e pratika natural ne'ebé iha kona-bá oportunidade servisu ba fetosira ne'e ki'ik liu. Organizaun Fetosira ne'ebé hetan entrevista, sira hato'o katak desde independesia to'o ohin lora iha vaga ruma ne'ebé loke iha husi administaraun publiku sira oportunidade ba fetosira maximu maka ema na'in 2 (rua). Sira konsidera ne'e hanesan marjinalizaun ne'ebé iha hodi hadook partisipasaun fetosira iha dezvoltamentu.⁴⁴ Iha partika balu ne'ebé la'o iha sosializaun involve deit autoridade lokal mane no autoridade munispal sira deit, depois rezultadu sira la informa fila ba nivel estrutura suku. Delegada iha Suku Kamanasa nia lamenta hahalok sira nune'e no nia hatete dalabarak nia halo kritika maka'as hasoru xefe suku no xefi aldeia sira. Maibe ho ho prespetiva ida husi mane sira nia maka fetosira iha kotuk no mós influnesia husi lisan ka kultura ne'e rasik katak wainhira fetosira ko'alia liu mane sira bele vida la naruk.⁴⁵

Kuaze maoria fetosira seidak iha kuinesementu kona-ba projetu Tasi Mane ne'e. Iha SSD iha Labarai, Maluro no Betano fetosira husu atu sira bele hola parte iha sosializaun sira ne'ebé Governu halo kona-bá projetu Tasi Mane. Liu tan ida ne'e fetosira mós kebra kona-bá oportunidade servisu ne'ebé durante ne'e aplika, ne'ebé konsidera la justu tamba sira ne'ebé afetadu la involve iha servisu. Hato'o mos katak ema sira ne'ebé mai tein hahan ba kompania no trabalador sira, mai husi munisipiu no nasional, sira ne'ebé afetadu ekskluidu. Kuaze sira hotu perokupa kona-bá graduadu sira ne'ebé laiha servisu no abandonadu maske servisu ne'e loke iha sira nia rai, maibe sira lahetan nafatin servisu, tamba Governu ho kompañia ne'ebé halo projetu, mai ho nia trabalador rasik.

3. Violensia domestika, seksual no trafiku umanu

Implikasaun seluk husi projetu Tasi Mane nia ba fetosira maka iha potencia ba aumenta violensia domestika, violensia seksual no trafiku umanu. Ida ne'e konsidera hanesan ameasa ba fetosira iha implementasaun projetu Tasi Mane. Komunitade afetadu sira no organizaun fetosira ne'ebé hetan entrevista sira preokupa kona-bá ameasa sira ba fetosira iha futuru projetu ne'e implementa. Sira mós hato'o ona violensia sira ne'ebé dadaun ne'e rejista aa's. iha FOKUPERS Suai – relata katak krime ne'ebé a'as iha Munisipiu ne'e; violensia domestika, arte marsiais no disputa rai. Iha mos, violensia seluk kona-bá abuzu de poder, uza ema seluk nia naran/kompetensia atu bele halo servisu. Nia hatutan katak violensia sira ne'e sei a'as wainhira projetu ne'e la'o. "Violensia domestika sei aas, violensia fiziku sei a'as. Fetosira sei hetan abuzu seksual oin-oin. Iha ne'ebé autoridade seguransa seidak atua ho profesional. Indika mós kazu balu to'o tiha polisia mos haruka sira fila ba rezolve tur familia. Iha mos abuzu poder – komunitade balu hetan violensia fiziku husi autoridade lokal tamba komunitade la koho fó be dalan.⁴⁶

⁴³ Do Carmo Hilaria, Amaral, Koodenador ba Dezenvolvimentu Fetosira Rurais, Centro Komunitade Suai (2020. 07. 28). Entrevista Pesoad.

⁴⁴ De Jesus, Antonia – Responsavel Justice Formal no Asistencia ba Fetosira FOKUPERS Suai (2020. 07. 28) Entrevista Pesoad.

⁴⁵ De Araujo, Joanina – Delgada, Suku Kamanasa (2020. 07. 29) Entrevista Pesoad.

⁴⁶ De Jesus, Antonia – Responsavel Justice Formal no Asistencia ba Fetosira FOKUPERS Suai (2020. 07. 28) Entrevista Pesoad.

Iha Covalima ne'e fronteira ho Indonézia, iha comunidade barak maka seidak iha kuinesementu kona-bá asaun sira husi krime organizadu sira nia. Ho projeitu boot ne'e sei konvida ema husi nasaun oin-oin mai buka servisu. Komunitade barak maka seidak hatene trafiku umanu, tamba ita nia katuas ho ferik sira ne'e dala ruma ema mai ko'alia (lohi) oan feto atu ba hatama servisu, sira autoriza deit, sira lahatene katak ne'e ba duni servisu ka halo buat seluk. Iha kazu balu ne'ebé akontese iha Suku Maudemo, Centro Komunitade Suai deskobre wainhira ba fó formasaun maka sira konta, trafiku umanu sira foti osan tiha ba bosok no haruka ba servisu, haruka osan ne'e mai nufin feto ne la mai osan ida mos la mai.⁴⁷

Iha munisipiu Covalima FOKUPERS rejista kazu violênsia domestika 74 husi ida ne'e kazu maka'as liu violênsia tamba razaun sira ekonomia, tuir disputa rai, no GAM. Razaun sira ekonomia ne'e mak risku ida iha futuru ba feto sira sei hetan abuxu seksual. Lider organizasaun feto nia, sira fó ezemplu katak feto sira hetan asedu seksual iha servisu nomos tuir dalan depois fila servisu husi servisu fatin.

Dezafiu ba feto sira maka sei dezenvolve feto nia kapasidade iha area sira ne'e. Durante ne'e feto sira laiha oportunidade. Feto barak maka sei moris iha vulnerabilidade ne'ebé dalawa'in provoka violênsia domestika, asedu, violasaun seksual ba minoriedade sira. Kazu sira hanesan ne'e akontese hela iha comunidade nia leet. Diretora FOKUPERS Munisipiu Covalima hato'o kazu ne'ebé rejista a'as liu iha maka violênsia domestika, tuir disputa rai, no violensia entre GAM. Lider organizasaun feto ne'e fó ezemplu katak feto sira hetan asedu seksual iha servisu nó mós tuir dalan depois fila servisu husi servisu fatin. Iha potensia sei aumenta maka'as wainhira feto nia kuinesementu la dezenvolve ho diak. No iha fator seluk ne'ebé kontribui ba violênsia, violasaun seksual no incestu maka kondisaun ekonomia familia, kondisaun uma ne'ebé la seguru.⁴⁸ Enkuntu projetu ne'e sei emprega ema husi nasuan oin-oin iha pontensia ba fen la'e soe malu.⁴⁹

Enkuntu violênsia sira tan razaun ekonomia tuir FOKUPERS Covalima hatete kondisaun ne'ebé feto sira hasoru, halo feto sira defisil atu dezenvolve-an tamba problema ekonomia uma laran ne'ebé dalabarak hakarak dumina deit husi mane sira. "Mane sempre dumina ekonomia uma laran entaun dalabarak mosu violênsia domestika ne'ebé kauza husi fahe osan la hanesan. Feto ne'e hanesan banku segundu ne'ebé rai osan familia nia, maibe ida ne'e seidak iha konsiensia husi mane sira. Dalabarak feto sira nia hanoin ne'e la iha atensaun husi mane sira".

Governu fó uluk osan duke fahe informasaun sira ne'ebé jere osan ho diak hodi benefisia ba comunidade afetadu sira. Tamba comunidade sira entrega ona rai produtivu sira entau tenke uza osan ho diak hodi benefisia ba sira iha tempu naruk. Faktu sira ne'ebé FM identifika familia balu utiliza osan kompensasaun ho diak hodi hadia sira nia uma, halo negosiu no selu sira nia oan ba eskola. Maibe balu la consege utiliza ho diak osan ne'ebé Governu selu ba sira nia propriedade sira.

⁴⁷Do Carmo Amaral, Hilaria – Coordenador ba Dezenvolvimentu Feto Rural Centro Komunitade Suai (2020. 07. 27) Entrevista Pesoal.

⁴⁸De Jesus, Antonia - Responsavel ba uma Tranzitu FOKUPERS Suai (2020. 07. 28) Entrevista Pesoal.

⁴⁹Dias Igilda, Maria – Delegada (2020. 12. 15) SSD iha Suku Betano.

Violensia ne'ebé akontese husi uma laran tanba balu simu osan kiik no boot. Violensia ekonomia ne'ebé to'o hamosu fahe malu (dovorsiu) tamba seidauk sensebiliza kona-bá igualidade jeneiru. Coordenadora-Forum Organizaasaun Komunikasaun Feto Covalima hatete ho kondisaun ne'ebé feto hasoru ne'e feto sira mós defisil atu dezenvolve-an tamba problema ekonomia uma laran. Mane sempre dumina ekonomia uma laran entaun dalabarak mosu violênsia domestika ne'ebé kauza husi fahe osan la hanesan. Feto ne'e hanesan banku segundu ne'ebé rai osan familia nia, maibe ida ne'e seidauk iha konsiensia husi mane sira. Dalabarak feto sira nia hanoin ne'e la fó atensaun husi mane sira, feto labele marjinalizadu beibeik husi dezenvolvimentu ne'e.

Relatoriu FOKUPERS indika katak nu'udar dezafiu boot ida iha sociedade Timorensis sistema patrikal ne'ebé ho komportamentu no mentalidade nakonu esterótipos. Fiar, konstume, no pratika patriakal sira maka dalabarak hamenus feto nia direitu no liberdade, bele rezulta ba violênsia domestika no violensia bazeia ba jeneiru; subordinasaun feto; edukasaun menus no la dun iha kapasidade; dependensia ekonomiku ba mane; no laiha rai ka asesu ba rai aumenta tan risku ba feto.⁵⁰

Nune'e mós menus kuinesementu kona-bá igualidade jeneru, iha uma laran dezisaun hotu depende ba mane, sei laen ida dehan la bele ba servisu feto halo tuir deit, ne'e atu evita violênsia. Iha kazu ida maka Uma Mahon rejista, feto kalan ba tein ba kompañia fila tarde hetan baku husi nia laen. Hahalok sira ne'e mosu ho kustume iha sociedade ne'ebé hatete katak ema servisu ne'e ba servi mane.⁵¹ Nune'e presiza iha formasaun no sensebilizasaun, atu ema hotu presiza iha formasaun baziku kona-bá jeneru.

4. Forsa seguransa nia papel no resposta sira

Autoridade seguransa nia responde ba konfliktu ne'ebé mosu. Iha suku OPS sira maka representa PNTL atu halo prevensaun no hamutuk ho lideransa komunitaria sira rezolve problema. Maibe ho projetu boot sira OPS nia papel ladun funsiona tamba krime ruma mosu kompañia sira prefere liu husu apoiu husi BOP ka Task-Force halo atausaun.⁵² Iha atusaun balu ne'ebé PNTL hatudu la netru, kazu ida ne'ebé feto sira preokupa akontese ona iha komponente sira SSB nian. Ida ne'e diferensia ho komponente husi LNG-Beaço no pertkimika no Refinerai – Betano nia, ne'ebé comunidade afetadu no lider komunitariu sira hato'o katak durante implementasaun sosializasaun ne'ebé Governu halo ho prezensa husi forsa seguransa maibe seidauk akontese problema, maske nune'e sira mós hato'o katak ne'e la signifika la akontese, talves tamba implementasaun konstrusaun ne'e seidauk la'o.⁵³

Iha Suai violênsia ne'ebé akontese liga ho konstusaun auto estrada hetan intervensaun lalais husi BOP. Iha kompañia sira iha akordu ho PNTL atu asegura implementasaun projetu, intervensaun sira ne'ebé lalais wainhira hetan kontaktu husi kompañia sira.

⁵⁰ Relatoriu FOKUPERS (2016, Dezembru) FOKUPERS 2013-2016 - Sobrevivente Feto Forte Hakotu Siklu Violensia.

⁵¹ Fernandes da Costa, Paulina – Coordenadora uma paz Manufahi (2020. 11. 25) Entrevista Pesoal.

⁵² Amaral, Mouzinho – Xefe do Suku Labarai (2020.07.27) Entrevista Pesoal

⁵³ Amaral, Fransisco – Xefe do Suku Maluro (2020. 09.15)

Autoridade lokal sira hatete la satisfetu ho PNTL nia atausaun sira durante projetu ne'e la'o, iha atusaun balu ne'ebé sira halo, haree liu ba interese kompañia sira nian, funsionamentu polisimentu komunitariu ne'ebé hala'o husi OPS servisu hamutuk ho autoridade lokal sira la konsidera tiha.⁵⁴

Iha sorin seluk PNTL rasik preokupa ho nia kapasidade rasik oinsa atu atua ba violênsia sira ne'ebé liga ho projetu Tasi Mane nia. Ho menus rekursu ema no kapasidade profesional ne'ebé PNTL rasik seidak dezenvolve ho diak. Projetu Tasi Mane ne'e projetu ida ne'e boot, ita kompara no nasaun boot sira kuando dezenvolvimentu mina ne'e la'o, krime organizadu mós la'o, no nia ameasa ne'e halai liu ba seguransa. Iha ne'ebé PNTL iha misaun ne'ebé hatu'ur iha konstituisaun RDTL artigu 147 katak garante seguransa ba sidadaun sira inklui sira nia riku soin. Nune'e sai preokupasaun ba setór seguransa tamba wainhira dezenvolvimentu ne'e la'o volume krime mós aumenta nune'e rekere instituisaun ida mais preparadu.⁵⁵

Iha potencialidade ameasa ba seguransa nasional ne'ebé ejije PNTL nia kapasidade maka, ita hare Kosta Sul ne'e liga ho fronteira tererestre ho Indonezia no tasi ho Australia hanesan nasaun viziñu rua ne'ebé besik ita ho dezenvolvimentu ne'ebé avansadu. Maibe PNTL rasik seidak iha kapasidade suficiente atu hatan ba ameasa boot ne'e iha futuro, menus rekursu ema, facilidade, ekipamentu sira ne'ebé apoiu atausaun ida modernu ho profesional.⁵⁶

Projetu boot ne'e mós sei emprega ema barak mai husi nasaun oin-oin, aliende tekniku sira husi nasaun seluk no mós servisu na'in sira husi rai laran nia. Servisu ne'e la'os Timor-oan deit maka involve ne'e projetu nasional iha mós kompetisaun la saudavel ne'ebé bele provoka konfliktu. Iha konstrusaun auto estrada ne'ebé kaer husi kompania Cina enkuantu aeroportu Suai ne'e kaer husi kompania Indonezia. Kompania sira mai ne'e ho nia trabaladór sira husi liur.⁵⁷ No Exmplu kazu ne'ebé rejistu PNTL rejistu maka kona-bá hadau malu servisu wainhira Timor Resource mai fura mina matan, joven sira husi Bairo laran no husi bairo seluk mai halo protesta no husu atu servisu. Ne'e dezintedementu entre joven sira ba servisu, ne'e la'o dadaun ona kona-bá projetu Tasi Mane nia.

Konkluzau

Komponente husi Tasi Mane maka baze forneseamentu *Suai Supply Base* (SSB) iha Suai-Covalima, fatin ba *Refineria no Industria Petrokimika* iha Betano-Manufahi, no instalasaun planta LNG iha Beaço-Viqueque, ne'ebé define ona iha PEDN. Iha implementasaun projetu ne'e Governu hahu ho faze konsultasaun públiku, no estudu sira kona-bá impaktu ba meu ambiente no uma, kontinua iha faze sira ba libertasaun rai no properiedade, no tama ona iha faze implementasaun.

Komunidade nia esperansa ba Tasi Mane maka benefisiu diretus no indereitus husi planu projetu ne'e nia. Komunidade sira lakon dadaun ona sira properiedade, rai ba halo to'os

⁵⁴ Amaral, Mouzinho – Xefe do Suku Labarai (2020.07.27) Entrevista Pesoal

⁵⁵ De Sá, Antonio – Komandante PNTL Munisipiu Manufahi (2020.08.13). Entrevista Pesoal.

⁵⁶ Das Regras Viana, Joni – Komandante PNTL Munisipiu Same (2020.11.24) Entrevista Pesoal

⁵⁷ De Sá, Antonio – Komandante PNTL Munisipiu Manufahi (2020.08.13). Entrevista Pesoal.

no natár, plantasaun, rai ba husik animal no mós ba hela fatin. Ida ne'e sai tiha ona preokupasaun boot ida ne'ebé iha comunidade afetadu nia le'et no liu-liu feto sira infrenta dadaun ona impaktu husi dezvoltimentu ne'e. Aleinde presau indireita ne'ebé kauza husi projetu ne'e, comunidade afetadu (feto) sira mos la hetan atensaun, no laiha infomasaun ne'ebé serteza kona-bá projetu ne'e rasik, nia impaktu ba sira nia moris iha aban bain rua nia.

Maske iha planu Governu nia, maka sei dezvoltive grupu ho atividade oin-oin ne'ebé ejiste partikulamente iha area afetadu sei hetan benefisiu ne'ebé maka'as wainhira projetu ne'e implementa. Maibe iha realidade hatudu oin seluk. Servisu ruma kona-bá "*buruh kasar*" afetadu sira la hetan fatin atu servisu. No exemplu kazu iha implementasaun komponente SSB nia, iha konstusaun aeroportu no auto estrada iha Suai, traballadór sira ne'ebé mai servisu kompañia sira lori husi liur. Feto sira lahetan oportunidade ne'ebé barak liu atu bele partisipa. Feto sira hatete katak sira nia servisu maka kuda duut iha auto estrada ninin, tein hahan ba kompania ho traballadór ne'ebé sira bele fornese maibe ne'e mós indikasaun iha nepotizmu no familiarizmu. Nune'e afetadu sira ne'ebé hein pomesa Governu nia, hato'o durante faze konsultasaun públiku/sosializasaun sente triste no arepende tamba sira la sai na'in maibe sai deit bainaka iha implementasaun projetu ne'e. To'o iha ne'e, Governu rasik laiha polítika ida espesifiku oinsa atu involve feto iha projetu Tasi Mane nia.

Projetu ne'e implementa dadaun ona komponente iha SSB nia maka, aeroportu Suai no auto estrada (sei kontinua to'o Beaço). Iha ona impaktu real ne'ebé comunidade sira hasoru dadaun ona, tratamentu desigual, presau no ameasa sira wainhira iha ejijensia sira ba nia direitu, nune'e mós fó ona impaktu ba meu ambiente, ba saude, edukasaun no ekonomia, no vida agrikula nia. Enkuantu iha komponente kona-bá refinaria no petrokimika ne'ebé iha faze libertasaun rai, Governu halo disputa ba comunidade (balu) nia rai, ne'ebé hatudu dadaun ona dudu projetu ne'e ba oin ho forsa Estadu nian. No ida ne'e sai ona preokupasaun ema hotu nia ne'ebé hola parte iha peskiza ida ne'e, liu-liu feto pesoal ho lider organizasaun feto sira preokupa maka'as kona-bá tentativu sira ne'ebé sei sai poir liu tan hasoru feto sira iha implementasaun projetu ne'e iha futuru. Katak ho soseidade ida ne'ebé seidak sensivel ho asuntu jeneiru, potensia sira violensia domestika, violasaun seksual sei sai maka'as liutan. Iha ne'ebé komponente husi Tasi Mane ne'e liga ho fronteira terrestre no tasi rai vizinu rua ne'ebé nia dezvoltimentu abansadu. Haree fila fali ba Timor-Leste nia kapasidade ba seguransa ne'ebé sei frajil ba kondisaun, fasilidade no ekipamentu, rekursu umanu no profesionalizmu.

Rekomendasaun

7. Rekomesaun ba Governu liu husi EKI (MPM, MJ, MAP, MAE, MI, SEMA) ba projetu Tasi Mane halo sensibilizasaun nasional kona-bá projetu ne'e nia impaktu comunidade sira enjeralmente ba sira ne'ebé afetadu projetu Tasi Mane nia liu-liu ba feto sira;
8. Halo avaliasaun ba prosesu sira ne'ebé la'o ona liu-liu lisaun sira husi konstrusaun auto estrada no projetu aero portu Suai ne'ebé feto sira sai vitima maka'as ba dezvoltimentu ne'e husi prosesu inisiu to'o ramata;



9. Ministeriu Justisa-Sekretariu Estadu Teras Propriedade socializa Lei Rai nian ba comunidade sira. Nune'e comunidade sira sensebilizadu ho lei rai nia no uza hodi rezolve disputa sira ne'ebé liga ho rai, tuir mekanizmu formal no tradisional;
10. Governu liu husi MPM, MEJD-SEFOPE indentifika no loke kursu vokasional besik ba comunidade sira. Formasaun iha area sira hanesan, ligua, enjineria, mekanika, pedreiru, karpintaria, no mós formasaun ne'ebé foku ba area sira ne'ebé feto nia hanesan hospitalidade, hotelaria, nst;
11. PNTL presiza dezenvolve polisimentu komunitaria hodi aproxima problema sira ne'ebé liga ho implementasaun projeitu, evita involve atuasaun sira husi BOP;
12. Governu tenke iha planu ba projetu infraestrutura petroliu Tasi Mane nia nune'e iha konstrusaun sira tenke asesivel ba ema hotu liu-liu ba ema ho vulneravel sira.

Aneksu A: Entrevista Pessoal

Naran	Pozisaun
Covalima - Suai	
Antonio Maria de Sá	Komandante PNTL Munisipiu Covalima
Fernando da Silva	Chefe Departamentu MAP
Hilaria Amaral do Carmo	Kordenadora ba Feto Rurais - Centro Komunidade
Antonia de Jesus	Responsavel Uma Tranzitu – FOKUPERS
Mauzinho Amaral	Chefe do Suku Labarai
Joanina de Araujo	Delegada Kamanasa
Elvira da Costa	Komunidade Afetadu Auto Estrada
Isabel Amaral	Komunidade Agrikultór
Armando de Araujo	Komunidade afetadu Aero Portu Suai
Viqueque	
Mateus Ramos Pereira	Diretúr Teras Propriedade
Carlos Pinto	Diretúr MAP
José Afonso	Komandante Operasaun PNTL
Luciana Guterres	Prezidente Asosiação Feto Potensial
Luis Sarmiento	Chefe Centro Komunidade
Angelina de Alves	Jornalista Radio Komunidade
Fransisco Amaral	Chefe do Suku Maluro
Bendita Soares	Komunidade Agrikultór
Ricardina Soares	Komunidade Agrikultór
Jose Soares	Komunidade
Virgina Martinz	Delegada
Domingas Soares de Araujo	Delgada
Jose Claver	Delegadu
Manuel Soares Pinto	Delegadu
Manufahi – Same	
Joni Viana da Regras	Komandante PNTL Munisipiu Manufahi
Francelina Tilman	Diretora Delegasaun Teritorial PDHJ Same
Josefina Tilman	Chefe Grupu NGO HAFOTI Betano
Paulina da Costa Fernandes	Kordenador ba uma paz Manufahi
Filipe de Araujo	Chefe do Suku Betano
Saturinha da silva	Chefe Aldeia Seli-Hasan
Rosalina da Costa	Komunidade Agrikultór
Olinda da Costa	Komunidade Negosiante
Amelia da Costa fernandes	Agrikultor

Aneksu B: Security Sector Discussion ho Grupu Feto

Munisipiu	Naran
Covalima	
Labarai-Suai	Agostinha de Jesus
	Merciana P. de J
	Maria do Carmo
	Eduarda Cardoso
	Maria Imaculada
	Alexandra D. C. M
	Felicidade Gusmão
	Joana de Jesus
Alzira do Nascimento	

	Elizete do Nascimento
	Leopoldina de Andrade
	Acaçia de Jesus
	Aguida Cardoso
	Corlindo do Nascimento
	Mouzinho Amaral
Viqueque	
Maluro – Viqueque	Monica da Silva
	Anita M. Fernandes
	Alita da Costa
	Marcelina da C, Quintão
	Joaquina Moreira
	Teresa Soares
	Marciana Soares Pinto
	Cristina Fernandes
	Materlinda N. Freitas
	Raquela Soares Pinto
	Domingas S. de Araujo
	Adoltensia
	Suzana do Rego
Manufahi	
Betano - Same	Julita de Andrade
	Maria Zilda Dias
	Lourença Caldas
	Eliza Machado
	Olandina M.
	Ilda Nunis
	Martina T.M
	Isabel da Costa
	Maria Pereira
	Fernanda Tilman
	Merita de M. Magalhães
	Alcina Xavier
	Recardina Sereno
	Aurora Fransisca
	Dina Mariana N.
	Agostina K. dc. C
	Teodora Tae
	Gizolha Verdial Pereira
	Zulmira da Costa
	Andre Tilman
	Julião M. da Costa
	Olinda da Cruz
	Juvita Pereira
	Josefina Tilman



Bibliografia

Plano Estratejiku Dezenvolvimentu Nasional (PEDN, 2011-2030)

Relatoriu Governu (2018) Programa VIII Governo Konstitusionál ba periodu 2018-2023. Paj.71-74).

Relatoriu Sensus (2015) – Sensus Fo Fila Fali Suku Maluro Munisipiu Vikeke

Relatoriu FM (2013) Projetu Refinaria no Petrokimika: Mega Projetu ka Mega Ameasa. MNL. Nú.58.

Relatoriu Ministeriu Petroliu Minerais (2020) Posesu do Governasaun MPR 22 Juñu 2018 – 22 Maiu 2020.

Relatoriu FM (2010) - Disputa Rai ho Estabilidade Nasional Iha Timor-Leste. MNL, Nú. 8.

Relatoriu FOKUPERS (2016, Dezembru) FOKUPERS 2013-2016 - Sobrevivente Feto Forte Hakotu Siklu Violensia.

Relatoriu FM (2013). Projetu Suai Supply Baze: Dezenvolvimentu Ka Ameasa. MNL. Nú.57.